



國朝滇黔平西王吳三桂粵平南王尙之孝閩
靖南王耿精忠康熙十二年奉



召入覲當年十月吳三桂抗命反尙王亦反耿王
於次年三月二十四日叛於閩

國恩高厚同天地三逆披猖不勝誅隨筆直
書留稗史後人休笑作焚餘

耿逆叛卽起兵寇浙江衢州所屬常山等縣
失陷時總督李之芳力爲捍圍耿逆遣僞左
軍都督曾養性由福寧州而來將士獻城總

兵吳萬福合家受戮

孤忠許國能授命反面如何却事仇功罪
事平殊不爽留芳遺臭見薰蕕

十三年四月間曾養性率寇經溫州平陽縣
遊擊司徒猷獻城逼溫郡總兵祖弘勳城守
副將羅萬里副將楊春芳遊擊魏萬侯等戰
賊敗績溫郡接壤黃巖黃鎮阿爾泰顏羽達
督撫兩臺交移提督塞白理親援

五月二十二日寧波提督塞白理率兵自寧

抵台赴溫進勦塞體肥胖憚於鞍馬至臨海
桑洲淺瀨平灘塞藉舟筏不備希嗾巡撫劾
台守高培不遂不得已乃從寧海薄台纔千
餘騎頗不馴服所至索食甚於索逋民艱於
供應恙其驕橫羣向塞愬塞置不問延挨多
日方行

寧兵援勦最豪梁祇是停鞭氣已揚餽餉
家家盛雞黍那知含淚典衣裳

六月初九日寇陷溫州總兵祖弘勳城守副

將羅萬里開門降賊城守副將楊春芳遊擊魏萬侯溫處道陳丹赤永嘉知縣馬璆皆死之

塞白理師援溫州日行三十里至則已踰五日之期緣塞有幕掾素與閩寇交密早與寇訂約勿犯寧波挨事平傳檄可定故而後期及塞詣溫之館頭地方不渡而還溫州遂陷後掾冒軍功卽補官東粵索塞厚贖不予掾持塞短塞怒羈其家丁五人手刃其三腹將

苦諫乃止由是塞之妄行無忌聲遍浙東矣塞於是月十八夜經台卽抵寧波

寧兵潛遁夜偏涼寂歷荒郊驛路長幾陣南風吹劍戟一灣明月照戎裝

二十七日金華山賊陷僊居知縣鄭錄勲副將汪國祥內外夾擊賊寇李雲就擒斬之餘黨潘蔣等仍潛匿於山谷險峻之處

二十八日杭州駐防都統周雲龍帶滿兵到台

七月寇逼樂清縣不戰而降樂清乃溫郡北
邑至大荆七十里大荆至黃巖亦七十里八
月初二日寇遂逼黃巖屯扎南門外羽山太
平黃巖鄉村男女奔竄已受脅制

八月初三日總兵阿爾泰盡部鎮標兵城守
兵併象山新昌二營調至兵於是日出戰南
門外大敗

初曾養性在溫黃巖城守叅將武灝陰已納
欵陽修濠溝假爲備禦迄寇屯羽山薄南門

城下旌旗蔽日鎮標兵城守營兵與象山新
昌援兵約五千阿鎮欲決死戰初三日強灝
同赴敵賊勢披猖莫敵遂敗折卒一千五百
餘人諸將僅以身免時灝主降爾泰欲撤營
奔台爲灝所制黃人洶湧乘文武官聚議於
東門之祠山殿士民沿街塞道長跪乞命求
爲保全計爾泰不許降遣蠟書馳報台道提
督都統救援周都統遣薩克蘇部滿兵三百
至黃爾泰恃爲心膂撥守西門阿堅意死守

八月初八夜城守叅將武灝開東南三門降賊武灝早與賊通因滿兵守西城寇從西城殺入滿兵卽與巷戰俱死僅留二人匿城內三清橋陳孟玉家得脫薩克蘇自刎賊前軍都督李長春亦被滿兵擊死是晚爾泰左右皆離叛尙宿南門較塲擁數騎將歸署灝挾之偕降養性待爾泰以甥舅禮改名劉建中爲定遠將軍黃知縣熊兆昇江西豐城縣人不肯仕僞以僞定遠將軍祖弘勳掾吏仇維

貞管縣事城陷之後人民流亡市井坵墟所有民居俱賊佔住富者勒其供應貧者苦於力役遭僞苛政酷虐非常

長鬚廣額貌堂堂寇至甘心北面降門啓東南隳半壁丹崖俄頃失金湯

堪憐北旅至南疆巷戰俱亡最慘傷滿帥勢窮還自到忠魂應自返遼陽

前軍僞帥李長春隕命驚沙快煞人一死鴻毛何足論先教逆焰鬱難伸

阿鎮何嘗肯易心亂臣賊子逼難禁任加
定遠將軍號翻使英雄淚滿襟

苛政曾傳如虎猛寇來始信語非誣一時
老稚爭奔命那得驚魂繪鄭圖

偽都督曾養性統羣寇屯扎黃巖南門外羽
山設大紅哆囉帳房十餘座稱爲大營盤中
前後護衛皆嚴每日率羣寇在城東郭外二
里許餓虎山脚操練陣圖新降士民俱着割
辮蓄髮裹以網巾使用銅錢從閩省搬運內

鑄裕民通寶有土與一鄉民不肯要錢卽斬
於市

偽將軍朱飛熊閩人係水軍都督梟獍無比
每赤足不履駕大艚聯絡大船自海門排至
黃城北門外浮橋飛熊係聽曾養性節制不
時赴曾養性營盤商酌機宜至則有少年健
兒五百人跪之喚曰兒子皆服大紅哆囉呢
短甲遍體照耀寇容可畏
阮姑娘閩人乃係婆婦性最兇殘亦帶水師

寇五營此婦威猛莫倫舉步如飛遇夜恐人行刺獨宿桅斗之上部下之寇皆熬煎桐油磨煉兩足有赤脚者有穿名鐵草屨者怒卽殺人水戰時本婦輒爲先鋒

女妖作孽性難馴勁膂爭誇娘子軍夜卧桅頭看星斗遙占殺氣已摩雲

九月二十七日僞都督部寇半從黃鄉西度二城嶺槽溪駐劄郡城與門外江南章家溪等處地方祖弘勳阿爾泰部寇半從黃北鄉

度黃土嶺至郡與養性合兵分三營盤曾養性居中祖弘勳居左阿爾泰居右養性營盤後有刀斧手五百分布左右名曰後牆

十月初十日都統伯穆赫林吉爾塔布提督段應舉塞白理等率兵過浮橋戰於長天洋敗績渠帥曾養性偵王師之將襲夜半整衆以待我師由浮橋登陸甫衝鋒而滿兵接戰賊兵兩路一由紫沙壘殺出一從江岸殺來我師急回賊已將浮橋砍斷且馬向不善渡

津梁負傷者十之一墮溺者且十之四惟台
協中軍馬龍鼓綠旗趨雲峯山下抄賊後尾
踴躍移時寇恐空國而至悉衆來援戰可一
更逃歸數百人龍徐自將所部突圍踰護郭
嶺渡七里江帶殘兵歸郡時居民登高遠望
但見宵火燭天哭聲震野幾以是夕陷郡城
賊衆唱凱歌班師金鼓歡呼瑯瑯動聽

燈火更寒照倍明我師北走遄回兵仰天
大哭終何濟爭似渠家奏凱聲

金鐵琤鳴匹馬飛阿誰豪胆突重圍火明
野岸宵奔疾血洒江城夜戰歸

敗走將軍鬪鳥飛琤琤帶劍血中歸江頭
不畏浮梁滑猶顧諸旗作指揮

十四日僊居又陷先是僊居爲山賊李雲所
破知縣鄭錄勲僉書汪國祥已經恢復緣周
都統援台時帶滿兵纔七百人其半殲於黃
巖僅隨身三百餘人閒身羈旅監立情濃遂
赴僊居欲圖進取不虞寇皆閩人爲魁首者

朱福等強悍十倍於周又因周都統在僊數
失民心竟有投牒渠帥數愬之未幾寇榜周
罪狀通衢周懼卽遁回郡遂棄僊居知縣鄭
錄勲抱印趨杭

都統統師無所統投閒置散悔無功空思
樹立趨僊邑仍返霞封嘆路窮

樂安大尹最風流里巷瞻依已數秋寇盜
紛來驅馬去僊民含淚望杭州

都統威名薄岫雲如何鐵胆畏妖氛一鞭

飛渡三江水卓午馳回日未曛

十五日收陣亡屍天洋之戰本出有心轉成
挫衄然悔無及寇亦微有惻隱不忍顛越屍
傷於十五日在西岸各樹標聽親屬識認載
歸一時郡內通衢僻巷無不焚蘭蕪桂腥血
風迴聞者欲嘔薦死悼亡悲號日甚

戰罷亡多却少存已將桂酒賦招魂英靈
無數酬難遍合借江流作酒樽

自郡南爲賊所據沿江六七十裡如章家溪

龍潭輿等處俱築土圍與我師隔江而守又
水師賊將朱飛熊將大鯨戰艦一帶沿江停
泊於湧泉新亭後涇等處至我師俱從西北
陸路堅守提督塞白理等領兵守東路蔡嶺
龍王山等處堅築石城安設炮位以通寧波
大路都統周雲龍等領兵守白塔瞭倭山後
嶺及西路松山留賢等處俱布置營盤排築
土圍以通天台大路

星羅碁布獲霞城坦道東行達四明西望

危途爭會野宅山剡水又陳兵
布置各營盤開掘深濠暴露朽骨過者太息
墳土誰教作戰場新軍移任鬼潛傷千年
隴上松楸木迸作營前擊馬椿

僞總兵朱福旣據僊居遂領賊衆出天台大
路以斷糧草僊之西北接壤天台若橫水紫
凝諸村賊踪遊奕其間時屯於天封寺寺創
於唐制頗弘厥遇官兵輒拒戰我師竟爲所
敗糧道遂絕

可恨遊魂處處屯天封僻地擁山門官兵
死戰渠偏勝古壁曾看汚血痕

天封戰敗絕軍糧枵腹相看氣不揚傳得
漢時真上策唱籌聲震用沙量

二十七日都統周雲龍議屠台郡台道楊應
魁力爭而止周都統以賊東西搭造浮梁急
圖攻城城內驚惶俱欲逃竄且屢戰挫敗滿
兵全活無幾綠旗逃回甚衆疑台人與賊暗
通遂議屠台以守新昌賴楊應魁力主不可

以台爲寧紹門戶台失則浙東皆爲寇有周
雲龍又以糧道旣絕賊勢猖獗急不能守應
魁厲聲疾呼指文武滿漢官兵謂朝廷封疆
寸土難失若見危輒棄要我等何用滿漢軍
民咸推爲是先周都統棄僊居時應魁爭之
不能備將僊居若棄必致爲賊所據斷我糧
道等情已密啓

大將軍康親王暨

寧海將軍固山貝子覽啓深器重之以將來

計全台者必是人也又應魁到台時至紹之
嶧縣被山賊數萬所困應魁竟以防卒數百
人殺出重圍人咸服其智勇兼備無頽頽者
山寇蜂屯翅莫飛監司何計出重圍若非
智勇公兼備那得全台覩繡衣

十一月初四日

寧海大將軍固山貝子提師援台百姓頂香
跪迎遮道延袤六七里外俱告以荒亂慘傷
情形

貝子惻然動念慰以不必驚惶自有平寇之
策

貝子之蒞台也公聽竝觀不徇偏見功疑惟
重罪疑惟輕於文員諏以土俗民情於武職
每察以監功效力揣測多方徐施方畧井井
有條備言天封戰敗非諸將之怯乃三軍之
飢卽下令慰諭推牛醢酒大行犒賞諭以務
必堅壁固壘慎毋輕舉自是諸軍皆按甲不
動軍容肅然民亦賴以安堵秋毫無犯各得

安業

德星炯炯自天來方畧徐施保我台上帝
好生同一念歌聲四起咏臺萊

先是安設各營盤東盡半塆坦西極留賢毗
連三十里所有民間墳墓俱被開掘濠溝骸
骨暴露

貝子蒞台經過營盤見之不勝哀憫當卽傳
諭諸軍嗣後不許攤掘民塋及砍伐松楸違
者按以軍法又前殉陳之人遠乃遼薊近則

京口杭州等處亦卽諭下給以運費令子弟
爲其父兄僕從爲其家主卽將骸骨舁回各
遂首邱之望仁哉

貝子真澤及枯骨也

翩翩雁陣度寒空惆悵無端殺氣濃露冷
曉侵刀劍白月明夜照髑髏紅

積屍原野最堪憐勁骨先依烈火烟勸爾
英魂休亂戰好隨遺蛻葬重邊

會當風鶴時人人自危幸

貝子到台鎮靜調度大慰士民雲霓之望亡
魂得以安土其恩更莫大焉

初十日倍餉給山營諸軍陸營諸軍依山戍
守漸徧沍寒各有懷鄉之思楊應魁察其意
啓於

貝子卽下令諭倍月餉以給之歡聲如雷

霓旗虎帳擁城壕殺氣空濛目倍蒿江水
時時流戰血海風夜夜響金刀

孤城畫角吹江干雲際烽連遠樹寒勁敵

感恩知血戰挑燈笑把劍鐔看

劍俠從征遠別家揭來寒色滿江沙越東

迥異遼西地不認蓬根認蓼花

十二日發台協官兵交監司楊應魁推問周
都統以台兵與寇通疑終不解啓

貝子發問台副將秦弘猷而梗槩通賊竝無

實蹟應魁以誣啓

貝子素信應魁公忠其疑頓釋

敢將布鼓擊雷門試驗刀痕與箭痕揭得

覆盆還見日頓消疑謗頌

王恩

貝子令諭邑令王鑄鼎按地召集鄉兵面首
趨轅下餉以酒食金幣試有膂力者給以練
總劄暇則互爲守禦有事則導官兵先行旣
爲杜奸之計復得地利之宜軍前竹木動需
千百有司檄練總按戶分任尅期以交時稱
便焉

再申甲令練鄉兵助我雄師壯請纓賣犢

買刀爭隸籍深山窮谷振邊聲

王師壓境度支糜常然非徑渡靈江莫由陷敵

貝子檄同知祖進朝卽西門廂房爲船廠董
造江舟爲上津駕梁計

兵分水陸互攻圍我馬千羣舟楫稀咫尺
江流誰解涉徵工伐木令如飛

續演水師於東湖 貝子恐水兵未諳無以
迎敵遂令演習檄有司募水手搦舟演於東
湖戰舟遂成陣勢

霜葉飛飛暮色收戰船新製半沉浮叮嚀
湖水休添漲留待他年作夜遊
莫訝湖干水最清柁梢習戰似昆明鼓鉦
喧沓旌旛艷兩岸爭看動笑聲

舟泊城南金雞巖夜爲江流暴漲所駛失去
一半

貝子唯邑令是問令責管舟民戶願覓舟贖
罪 貝子笑許之乃披篋笠偕水手沿江號
哭見舟所在哭益慘盜詰之還以原船亦賊

心變爲苦心也

漫嗤人世泛虛舟哭到心傷寇點頭乞得
江舟歸故岸轉啼爲笑解邊愁

一舟縹緲逐滄浪典守難辭苦責償旋失
那能旋復得須知善哭是奇方

二十七日增白塔汛戍兵白塔寺角枕靈江
與瞭倭山密邇前撥守兵無多恐爲寇所據
北阻餉道

貝子允禩將議晚引步卒五百協防朝仍掣

回所撥之兵皆綠旂也

精藍地逼瞭倭山鐵甕金城豈等閒五百
健兒勤把握更無草竊覷重關

白塔寺前落日低綠旗掩映隊初齊今朝
令下須防夜薄暮揚鞭望眼迷

新令加兵白塔營朝歸暮出若爲情一杯
相勸添行色帶醉揚鞭好出城

十二月大雨雪軍馬皆飢軍中斗米三百錢
束草錢百文重價無由購自黃天僊三邑爲

寇所據在地糧草已絕大軍所需俱從寧波
由桐巖嶺運至台城

雨雪連宵萬馬哀營門鼓角漫頻催暫晴
未必堪塵戰緩待鄉兵運草來

貝子蒞台後領滿漢文軍不下十萬月支動
輒三萬七千餘石費若不貲諸將急欲議戰
貝子弗許

爭戰驍渠陣法精脫鞍解轡暫依營互寒
天氣且休息坐待開春再議兵

初二日 貝子以歲逼年饑民不聊生傳監
司楊應魁郡守高培令王鑄鼎轉傳縉紳議
法賑濟 貝子當發銀四百兩 諭台道守
令酌量捐賑併勸有力紳衿亦行傾助在天
寧寺煮粥救濟歲盡而止饑民得以存活
荒亂頻仍未止戈殘黎存活恐無多昨宵
思令施餽粥死得生全感若何

二十四日 貝子令各練總鄉兵暫回卒歲
諭爾等俱係鄉人屈在歲暮父母妻子倚閭
而望每名給銀一兩米三斗卽令回家各鄉
兵感恩無地願効力弗去 貝子嘉憫之

編氓歲盡尚操戈腸斷村村望眼多効死
從戎爭不去難忘滄海廣恩波

乙卯康熙十四年春王正月朔

貝子率百官 朝賀禮成命坐賜茶

流光如矢暗相催簫管春回幕府開麾下
千官隨賀朔酥醅捧出紫霞杯

新正大雨連宵軍皆苦之

春雨連宵不放晴梅花初白鐵衣明帳前
久卧軍無色趁此江邊好洗兵

十四日元夕禁慶賞 貝子令守令可傳諭
士民大寇對壘防範須嚴雖值元宵不得慶
賞

夫君征戍動經年明月空教向妾圓烽燧
參差燈火暗春宵應不值多錢

台山遙接海天低柳眼迷離萬隴齊眺望
湖邊青草地東風盡付馬嬌嘶

十九日沿江春草方綠牧人驅羣就食賊誤
爲兵駕船努力來禦飛報 貝子遣兵急迎
賊已退矣

十里平蕪恣牧馬健兒爛醉揚鞭打驚動
江邊小兩山盡馳弓弩來山下

都統周雲龍自帶兵來台 貝子察其無所
建白素不愜意周亦自知無所樹立殊苦岑
寂竟於別郡兌美人匿軍中侍起居後周知
貝子風聞卽遣去 貝子查無實跡又加嚴

飭周始悚然

美人顏色勝春花
遠別揚州到赤霞
午夜將軍鈴閣靜
高歌酌酒雜清笳
樹立無由不解愁
坐看美女劈篴篴醉傾
一石旋歌舞笑把
春花插滿頭

周都統隕於七里崖
下是日清晨烟霧逃
離寇疑有警隔江發
巨礮周都統適單騎自松
山回經七里地勢窄狹
飛彈擊巖石迴中周
左耳隨隕馬下而卒
天乎寇乎

何可凌晨單騎回
隔江飛礮震於雷
將軍已逐朝烟散
贏得佳人淚滿腮
地險無如七里灣
行人經過祝生還
自誇鐵首周都統
不道匆匆碎此間
三台蒼赤有何辜
毒計旋生付一屠
那識好生天有命
自罹飛礮血模糊

二十三日賊水師
都督朱飛熊弟朱光祖帶
兵一百餘人戰船三隻
投降將僞都督割繳
上

貝子 貝子納其降賞以功牌安置蔡嶺營
頓出邪途入正途殿前願作執爨夫 王
仁浩蕩真難量笑許降兵看陣圖

二十四日早各官啓見 貝子出獨留台道
楊應魁僊居令鄭錄勳商酌機宜

二十五日遂撥兵進剿僊居鄭錄勳密遣牌
一面潛行知會僊居大路居民速卽搬移大
兵不日按臨恐殃及無辜賊朱福連必中等
屯扎在城知我師進剿速報會養性又遣僞

總兵蔡玉樹領賊眾二千協守

二月初一日辰刻鄭錄勳爲鄉導我師統滿
漢兵克復僊居攻敗之餘賊雜民處黑白難
辨橫罹鋒鏑者不知凡幾先是 貝子以僊
居要地今爲賊所據遊奕天台地界不時阻
我糧道深爲可患故於二十四日獨留楊應
魁鄭錄勳等共議恢復僊居指畫甚善

初一日一舉卽報捷音

輔車相倚本天僊輸輓由來路最便籌復

樂安真上策况疏運道靖烽烟

初四日 貝子諭台道楊應魁查有賊踞城池能預爲投降者免其誅戮如有拒敵者一槩不留婦女給軍此本朝定例然也但僊民因我兵撤回被賊迫脅實非甘心從賊與他城失陷不同原其初情深有可憫該道卽諭知縣鄭錄勦查明婦女果有本夫及至親願領回者該縣稟明都統卽許准領爲此特諭雲鬢風鬟亂曉粧黃巾擄去最堪傷 王

仁似海重圓鏡婦子團圓日正長

初五日寇營小兩山

腸斷東風走馬還可堪強敵感愁顏春初猶駐于戈巽昨夜旋營小兩山

初十日 貝子令禁牧卒不許擾害村間

山村深處無烽警茂草豐林天更靜何可嘶風亂客心白雲峰畔千羣騁

野牧緣知虎將材山坪處處散龍煤東村雞黍西村酒爛醉高歌天馬來

清明不禁民人出城祭掃

杜鵑啼處杜鵑開特爲先塋祭掃來馬鬣
堂封營壘盡茫茫何處覓泉臺

東風吹散紙錢灰今日空澆酒一杯只有
饑鳥勤與祭不愁劍戟忽飛來

二十九日水寇大鯨陸續進泊小兩山議者
思效火攻

樓船遙接海雲黃一望春江正渺茫盡日
東風吹不去欲將妙計問周郎

二三兩月歸燕不巢而去是春燕自南歸暫
泊梁間終春之季不復葺壘哺雛豈畏兵乎
悶上粧樓望遠郊社公風雨暗山坳忙修
舊壘迎歸燕却避兵戈不敢巢

澤國無端事鼓鼙春和更聽馬羣嘶名園
花木曾如錦却被驅來踏作坭

總兵阿爾泰雖則降寇志圖復讐遣一技勇
號周千劬者持蠟丸三顆泅江欲入城啓
貝子致監司楊應魁與其隨征子夸藍大被

巡江寇兵夜於江面邏獲解寇帥僞總兵崔
轉解曾養性發之知其約於三月初七日決
戰養性當將爾泰拿解耿逆絞死又如其字
樣另寫血書蠟丸三畱別遣腹心來投改約
以初十日出兵爲期爾泰謀爲內應養性隨
將章家溪大營盤羣寇添入小兩山營內預
爲準備 貝子監司平素慎於行兵動謀萬
全早信爾泰無從寇意其子又在麾下故一
時莫察先令水師提督常進功舟師進發海
門夾攻竟於初十日夜調滿漢兵丁進攻小
兩山轉爲寇所敗計折滿兵三千餘漢軍亦
如之我師大挫是日爲立夏節

小兩山陰土染紅天開勝地葬英雄八千
甲士殉邊戰夜半悲號鬪烈風

戰罷人亡可奈何髑髏無數葬江波夕陽
一片烏啼後潮落津橋戰血多

嶙嶙俠骨葬江濱眇眇鄉關萬里塵一點
英靈招未得千秋長作不歸人

雄豪燕將荷 君恩汗血旋枯體尚存
坭陷平腰弓已折怒髯猶自指營門
風沙滿戍已黃昏曾度深濠近墓門
誰道長眠人不醒夜和新鬼哭刀痕

十七日海戰大捷我師未攻小兩山時

貝子先令提督常進功帶滿漢水師進發海
門是日早寇首朱飛熊輒以身與官兵禦膽
悍異常常進功所攜鎗手三百名素號諳練
迎敵時百發百中戰日亭午炎氣蒸人飛熊

岸幘子持雙戟躍入我舟欲刺進功被目鳥
鎗中額而斃羣寇遂敗水軍功成奏捷

貝子大喜於邸第開讌行賞有差

海戰咸誇弓弩精更奇水手上流行飛熊
不作馮夷伴那得將軍奏捷成

北人素不善舟航此日偏教氣激昂
市鮫宮千頃浪猶如騎馬踏平康

鯨窟波平千頃綠艨艟轉戰輕於粟
驚人海月夜飛來搖曳魚檣扶左纛

十九日 貝子命祖同知撫恤僊居

僊居初復苦無民剩得刀餘有幾人寄語
哀鴻歸樂土回眸便見太平春

二十日 貝子由東門出巡視各營盤晚從
西門入見郊外田盡荒蕪不勝扼腕次日傳
台道楊應魁面諭米價騰湧轉輸又艱食乃
民天可卽示各鄉兵速回及時播種毋荒農
業

拋却犁鋤學枕戈離家旬月柰愁何帳前

乍拜歸農令一曲秧歌作凱歌

四月初旬 貝子移邸第於白雲山初

貝子蒞台駐城心葉宦宅寇礮日從城外擊
入於 貝子第內更多震壘故移至城北白
雲山下揚園攻擊如前監司楊應魁啟

貝子言城中必有奸細隱匿故賊礮因所居
對發遂嚴諭各文員細加察訪獲得奸人王
從龍搜出偽劄係寇腹心前已謀入

貝子書記弁士宄邱文挺等數人戮之於市

內有生員葉大魁係從龍主歇實不知情背
綁視其行刑訖旋即放回嗣後軍機密不復
洩防範更嚴

那知肘腋伏窮兇機洩生擒戮社中礮響
連珠從此絕却勝對壘奏膚功

十二日水師常提督自海門領師回營藉賽
願爲名日演戲營中 貝子聞知傳諭責其
放佚以肅軍心

軍營日日喧金鼓裝飾梨園恣歌舞只今
袖手喜生還忘却江頭鏖戰苦

十六日 貝子親臨教場看兵先是 貝子
因春雨連綿甲冑霉爛器械鏽濕令各營將
主將滿漢弁兵挨次調撥入城看驗自十六
日至二十七日止每日親下較場細加點閱
隊伍整整軍容肅然可觀

雄師隊隊壯軍容旗鼓相當逞鬪鋒特御
臯比親大閱人呼虎賁馬呼龍

淡黃楊柳戰袍紅蔽日旌旂師自雄莫道

觀兵徒耀敵已籌奏凱掌中中
兜鍪魚貫出沙場卓立軍前似堵牆尺籍
唱傳名姓後金戈鐵馬氣生香
五月五日 貝子令聽軍中酌酢

王師壓境又端陽壁壘羣醜蒲酒香兒女也知兵
未解故簪綵勝顛釵梁

榴花如火宜簪戴萱草忘憂憂轉大海國
新看劍佩多門闌何必懸蒲艾
佳節匆匆屆午朝城隅戰艦泛江潮龍舟

競渡今爭試不識誰能奪錦標

二十八日 諭監司楊應魁副將秦弘猷遍
視各營盤凡屯扎卑濕之地俱着就近移入
塹塹處以免徽氣薰蒸

東南卑窪連山塢陰霽無端蒸濕土布幄
籠烟憂不堪重移高塹禁風雨

六月初四日 貝子令傳滿漢文武各員凡
有割辦民人聽其入城往來貿易不許盤詰
先是 貝子商之監司楊應魁自統兵已來

所有市貿以供軍需者已嚴諭滿漢兵丁不許短價強買一粒不取寸草莫拾今訪得軍中需用物料騰貴非常其中必有阻碍楊應魁卽啓云郡中需用百物半產自仙天及黃巖沿海地方今居民俱被寇脅割辮仙天雖已平復民人尚不敢入郡故貿易無多需用不給自 貝子諭後其遠近逃竄者相率來歸不絕於道斗米尺布俱負戴入市城中大有起色

僞命傳來辮不留青絲剪下淚交流 王
慈浩蕩到窮髮摩頂搔頭任自由

僊居天台二縣自寇曾養性逼台郡以後山賊蜂起俱假大寇旗號徧滿天僊鄉村幸貝子恢復僊居山賊懼戰星散有洋梵地方居民七十餘人被地民出首誣爲真賊

貝子發滿帥與楊道研訊以無器械爲據難以懸坐啟 貝子槩行省釋

揭竿蠢動亦稱兵涇渭那分濁與清最幸

無辜羣解網殘黎額手頌神明

又沿海東路大芬泗淋數十里地方時有寇船挨岸停泊在地居民爲賊所制逼勒糧餉居民無奈供應有啓 貝子請屠之者

貝子以事出威脅非其得已令監司楊應魁訪實如果情真拿爲首者正法後楊應魁以地民居近沿海與賊船密邇且官兵遙遠救援不及民又以自保身家計首從無可區別貝子云通寇法雖難貸然則將如之何應魁

啓以大寇在境未除居民多乃無辜槩行誅之似覺不忍 貝子大然其言云爾先得我心今爾以片語全活數萬生靈其功德可與爾均之矣卽徧令滿漢各官此後如有不軌之徒自能廉訪得實無許爾輩妄啓以致反多滋累

殺不辜寧失不經摧殘善類豈祥刑生靈數萬聞 王命雷動歡聲盡頌聲

六月間因仙居已復賊寇已遁路無阻隔糧

草轉運甚便俱已充足滿帥啓議進兵

貝子以時當酷暑難以興師不許

書言炎夏不興師養銳藏鋒合待時耐
健兒偏索戰那知妙算故遲遲

七月初旬 貝子傳諭台道以天氣漸涼兵
屯已久所屬將領以師老紛紛議戰今何法
可謀全勝前據仙令鄭錄勳啓稱仙有別徑
可通黃巖以抄賊後但事乃走險雖曾密差
鄉導將地圖繪來瞭然在目又經斟酌再四

惟應否可行必須謀出萬全該道可託奉令
以巡視各營盤爲名將圖帶去與鄭錄勳備
相妥議并親至該縣前所啓別徑地方度其
形勢於地若利卽啓明候奪

聚米爲山羨伏波從天而下殄妖魔建瓴
破竹由他徑計日功成妙算多

初十日監司楊應魁奉 貝子令從仙居看
各營盤回遂傳滿漢將帥計議自早晨入見
至夜半方出

寇在門庭兵未休全憑幃幄定良謀銅龍
已滴三更漏借箸還留一運籌

十五日遣滿帥穆都統等統大隊大兵密從
仙居至茅坪嶺於二十八日抵黃巖地界經
涼蓬寧溪烏巖尾賊之後賊知大恐計無所
出於八月初七夜盡行拔營往溫州其半從
海門駕船而去其半從陸路而去皆罄壘夜
奔而自相蹂殺過黃在縣經宿一夜卽行
俄頃遊魂影盡消雄兵方逞我燕遼漫言

奏凱歌聲遍從此台城不夜刁

初八日 貝子盡提台郡滿漢兵馬追至拘
嶺駐扎至十四日至黃巖又追至樂清溫州
台州圍解自寇曾養性暨水軍朱飛熊部眾
寇逼台郡以來號稱十萬黃天仙相繼淪陷
兼之遇歲荒斂土寇蠶起人則蠢蠢勢則洶
洶若有不可終日者今一旦蕩平固我台人
之幸實賴

聖天子之福也

初 貝子蒞台台民以出自 王宮恐軍機
不甚曉暢民瘼或至上壅安望全活數百萬
生靈及到台後值大寇逼城乃不動聲色惟
急以撫恤殘黎爲先務且深知監司楊公才
識超邁可任器使凡鉅細機宜無一不相籌
畫而楊公又弘毅練達兼以公忠平恕無一
念一事不切民生 貝子內則寄以心膂外
則視爲手足遂能贊立奇勲解我台民倒懸
出水火而登之衽席 貝子誠爲福曜而楊

公亦實福星也康熙十四年八月日記

長白之山本帝都百二山河天下無真人
一出應世運金枝玉葉起匡扶

普天之下皆王土南顧浙東埒天府么膺
何物逆顏行潢池弄兵聞鼙鼓

賢王夔龍廊廟珍年少襲爵爲親臣 簡
命統師來東浙碩畫奇勲真絕倫

毒燄狂氛最猛烈滅此朝食方下咽雪甲
瑯戈虎帳開玉壘連營旗電結

鼓卧烽收休士卒間閭高枕樂寧謐遐邇
爭呼王者師不嗜殺人恩第一
布雲施雨澤風翔武緯文經並擅長天毓
宗藩衛社稷應知元老福難量

監司爭呼楊菩薩半壁台南藉彈壓湯火
民登衽席間重見重熙歌累洽

電掃風驅寇絕塵從茲婦子慶嬉春
天戈又向東甌指看奏膚功達

紫宸

